



REPUBLIKA E SHQIPËRISË  
ENTI RREGULLATOR I ENERGJISË  
BORDI

VENDIM

Nr. 170, Datë 16.08.2021

MBI

**MIRATIMIN E DISA NDRYSHIMEVE NË “RREGULLOREN DHE  
METODOLOGJINË PËR LLOGARITJEN DHE VENDOSJEN E DËMIT  
EKONOMIK TË SHKAKTUAR NGA NDËRHYRJET E PALIGJSHME NË  
SISTEMIN E MATJES SË ENERGJISË ELEKTRIKE”**

Në zbatim të nenit 77, pika 9, të Ligjit nr. 43/2015 “Për Sektorin e Energjisë Elektrike”, i ndryshuar; neneve 15, 19 dhe 26, të Rregullores për Organizimin, Funksionimin dhe Procedurat e ERE-s, miratuar me vendimin e bordit të Entit Rregullator të Energjisë (ERE) nr. 96, datë 17.06.2016, bordi i ERE-s, në mbledhjen e datës 16.08.2021, mbasi shqyrtoi relacionin nr. 112/4 prot., datë 12.08.2021, të përgatitur nga Drejtoritë Teknike, mbi miratimin e disa ndryshimeve në “Rregulloren dhe Metodologjinë për llogaritjen dhe vendosjen e dëmit ekonomik të shkaktuar nga ndërhyrjet e paligjshme në sistemin e matjes së energjisë elektrike”,

**Konstatoi se:**

- Bordi i ERE me vendimin nr. 232, datë 20.12.2019, ka miratuar “Rregulloren dhe Metodologjinë për llogaritjen dhe vendosjen e dëmit ekonomik të shkaktuar nga ndërhyrjet e paligjshme në sistemin e matjes së energjisë elektrike”.
- Bordi i ERE-s me vendimin nr. 61, datë 25.02.2021, vendosi fillimin e procedurës për miratimin e një ndryshimi në nenin 10, të “Rregullores dhe Metodologjisë për llogaritjen dhe vendosjen e dëmit ekonomik të shkaktuar nga ndërhyrjet e paligjshme në sistemin e matjes së energjisë elektrike”, **për afatet e lëshimit të faturës për Përdoruesin e Rrjetit dhe njoftimin e Furnizuesit.**
- Me shkresën nr. 443 prot., datë 12.03.2021, ERE ka njoftuar palët e interesuara në proces si, Ministria e Infrastrukturës dhe Energjisë (MIE), Furnizuesi i Shërbimit Universal (FSHU sh.a.), OSSH sh.a., Shoqata Shqiptare e Furnizuesve të Energjisë Elektrike (AAES), Bashkimi i Prodhuesve Shqiptarë dhe Autoriteti i Konkurrencës, mbi vendimin e bordit nr. 61, datë 25.02.2021 dhe ka kërkuar të marrë mendim lidhur me fillimin e procedurës për miratimin e disa shtesave dhe ndryshimeve në rregulloren dhe metodologjinë për llogaritjen dhe vendosjen e dëmit ekonomik të shkaktuar nga ndërhyrjet e paligjshme në sistemin e matjes së energjisë elektrike.
- Gjithashtu me shkresën nr. 519/1 prot., datë 12.07.2021, ERE ka ftuar Komisionin e Mbrojtjes së Konsumatorëve, Shoqatën e Mbrojtjes së Konsumatorit Shqiptar,

Konsumatorin në Fokus, Zyrën për Mbrojtjen e Konsumatorit, Qendrën “Konsumatori Shqiptar” dhe Avokatin e Popullit për shprehje mendimi lidhur me propozimin e shoqërisë OSSH sh.a.

- Në përfundim të afateve për marrje mendimi nga palët e tjera të interesuara, MIE, me shkresën nr. 2630/1 prot, datë 21.06.2021, është shprehur se *“lidhur me ndryshimet në nenin 2 (objekti i rregullores), shprehemi se objekti i rregullores dhe metodologjisë është i mire përkufizuar dhe gjithëpërfshirës, dhe se shtesat e propozuara janë elementë të karakterit teknik dhe nuk ka pse të përfshihen në objektin e rregullores. Për më tepër, nuk është parashtruar se si do të procedohej për rastet e propozuara lidhur me vlerësimin e dëmit, që në çdo rast do të duhej të reflektohej në seksione të tjera të rregullores. Për sa i takon ndryshimeve në nenin 10, lidhur me afatin e lëshimit të faturës dhe njoftimin e furnizuesit, shprehemi në parim dakord”*.
- Autoriteti i Konkurrencës, me shkresën nr. 147/3 prot., datë 02.08.2021, protokolluar në ERE me nr. 443/2 prot., datë 04.08.2021, shprehet se procedura e ndjekur dhe vendimi nr. 61/2021 i bordit të ERE-s, nuk bien në kundërshtim me ligjin nr. 9121, datë 28.07.2003, “Për Mbrojtjen e Konkurrencës”, i ndryshuar.
- Shoqëria OSSH sh.a., me shkresën nr. 5997/1 prot., datë 12.07.2021, ka paraqitur edhe propozimin e plotë për ndryshimet në nenin 10, të rregullores, si me poshtë vijon:

Neni 10, pika 1,

Ishte:

OSSH sigurohet që të informojë Furnizuesin dhe Përdoruesin e rrjetit në çdo rast që konstaton dëm ekonomik të shkaktuar nga një përdorues i rrjetit me të cilin Furnizuesi ka një kontratë furnizimi, jo më vonë se 48 orë nga konstatimi, përpara ndërmarrjes së ndonjë veprimi kundrejt përdoruesit të rrjetit.

Bëhet:

OSSH sigurohet që të informojë Furnizuesin dhe Përdoruesin e rrjetit në çdo rast që konstaton dëm ekonomik të shkaktuar nga një përdorues i rrjetit me të cilin furnizuesi ka një kontratë furnizimi, në momentin e emetimit të faturës së dëmit ekonomik.

Neni 10, pika 2:

Ishte:

OSSH lëshon faturë të posaçme të dëmit ekonomik të përlllogaritur për Përdoruesin të rrjetit, jo më vonë se 7 ditë nga konstatimi, e dërgon atë në adresën e përcaktuar në marrëveshjen e lidhjes me Përdoruesin e rrjetit dhe sigurohet që ta arkëtojë atë brenda 30 ditëve nga lëshimi i saj.

Bëhet:

OSSH lëshon një faturë të posaçme të dëmit ekonomik të përlllogaritur për Përdoruesin e rrjetit, brenda ciklit të leximit/faturimit (30 ditë), e dërgon atë në adresën e përcaktuar në marrëveshjen e lidhjes me Përdoruesin e rrjetit dhe sigurohet që ta arkëtojë atë brenda 30 ditëve nga lëshimi i saj.

- Këto ndryshime të propozuara nga OSSH sh.a., mbështeten në arsyetimin se, në kushtet kur OSSH sh.a., punon me cikël 30 ditor të sistemit të lexim/faturim-it, do të ishte më e përshtatshme që afati i lidhur me lëshimin e faturës të jetë brenda ciklit mujor të lexim/faturimit. Gjithashtu, propozimi për njoftimin e furnizuesit dhe përdoruesit të rrjetit në momentin e lëshimit të faturës përkatëse, OSSH sh.a. e shënjon si moment të zyrtarizimit të shkeljes/ndërhyrjes së paligjshme në sistemin e tij.
- Për sa konstatuar, arsyetimet dhe ndryshimet e propozuara në “Rregulloren dhe Metodologjinë për llogaritjen dhe vendosjen e dëmit ekonomik të shkaktuar nga ndërhyrjet e paligjshme në sistemin e matjes së energjisë elektrike”, gjykohen të pranueshme.
- Gjithashtu, theksohet se këto ndryshime në Rregullore, nuk cenojnë të drejtat e konsumatorëve të parashikuara në nenin 11, të së njëjtës Rregullore, si e drejta e ankimit në OSSH dhe/ose në ERE, në rast se kundërshton faturën e dëmit ekonomik të vendosur nga OSSH, ose pretendon se OSSH nuk ka ndjekur dhe zbatuar dispozitat e kësaj Rregullore. Po ashtu nuk cenohen afatet e ankimit qoftë drejtpërdrejtë tek operatori, qoftë në ERE.

Për gjithë sa më sipër, bordi i ERE-s:

#### **Vendosi:**

1. Miratimin e disa ndryshimeve në nenin 10, të “Rregullores dhe metodologjisë për llogaritjen dhe vendosjen e dëmit ekonomik të shkaktuar nga ndërhyrjet e paligjshme në sistemin e matjes së energjisë elektrike”.
2. **Neni 10, pika 1, e Rregullores:**

#### **Bëhet:**

OSSH sigurohet që të informojë Furnizuesin dhe Përdoruesin e rrjetit në çdo rast që konstaton dëm ekonomik të shkaktuar nga një përdorues i rrjetit me të cilin furnizuesi ka një kontratë furnizimi, në momentin e emetimit të faturës së dëmit ekonomik.

#### **Neni 10, pika 2:**

#### **Bëhet:**

OSSH lëshon faturë të posaçme të dëmit ekonomik të përlllogaritur për Përdoruesin e rrjetit, brenda ciklit të leximit/faturimit nga momenti i konstatimit, e dërgon atë në adresën e përcaktuar në marrëveshjen e lidhjes me Përdoruesin e rrjetit dhe sigurohet që ta arkëtojë atë brenda 30 ditëve nga lëshimi i saj.

3. Drejtoria Juridike dhe Zgjidhjes së Mosmarrëveshjeve të njoftojë shoqërinë OSSH sh.a., për vendimin e bordit të ERE-s.

Ky vendim hyn në fuqi menjëherë.

Për këtë vendim mund të kërkohet rishikim brenda 7 ditëve kalendarike si dhe mund të bëhet ankim në Gjykatën Administrative Tiranë, brenda 30 ditëve kalendarike nga dita e publikimit në Fletoren Zyrtare.

Ky vendim botohet në Fletoren Zyrtare.

**KRYETARI**  
**Petrit AHMETI**